

Zeitschrift: Die Berner Woche
Band: 38 (1948)
Heft: 4

Artikel: D's originellschte Agebot [Schluss]
Autor: Niehans, Rösli
DOI: <https://doi.org/10.5169/seals-633155>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 05.04.2026

ETH-Bibliothek Zürich, E-Periodica, <https://www.e-periodica.ch>

D's originellschte **A**gebot

Von
Rösli Niehans

Schluss

Vo da a hei mer us all Tag bi der Jumpfer Meier troffe und si het wägedäm bald als die chränkschti Pärson gulte im Dorf. Mängisch han i Müeh gha, die viele teilnehmende und gwunderige Frage z'beantworte und derby ärscht z'blybe und nüt z'verrate, denn d'Jumpfer Meier sälber het's meischterhaft verstande, der Grund vo ihrer Chrankheit z'verschwyge. Item, si isch uf all Fäll d'Ursach gsi, warum es du im Dorf bald umgangen isch, was e rächtli Grippe syg, und bsunderbar der Grad von ere Lungenzündig erkenn me scho allei am Gruch.

D'Jumpfer Meier isch zmits im Dorr gwohnt. Me het drum besser chönne kontrolliere, wie viel si z'tüe gäb und da het me du ünderinisch gfunde, es wär jitz doch a der Zyt, dass i es rächts Bett überchömm. Dass das aber no Schwierigkeite ggäh het, het mer der Herr Dokter erscht schpäter verrate. Es het nämlech en usserordentlechi Gmeindsversammlung bruucht, will mi wäger niemer welle het us Angscht vor der Asteckig. Der Schnyder het aber z'wyt ewägg gwohnt, für das i vo dert us hät chönne ds Dorf betreue. Schliesslech het me mir du im Schuelhuus es Bodebett zuegsproche. Der Unterricht isch ja wäge der Grippe sowieso usgfalle. Und so bin i dert grad no so inere Art Garantäne gsi. Me het mir du also der Huusschlüssel übergäh und so bin i jeden Abe dürs Dorf zottlet, im einten Arm die warmi Bettfläsche, i der andere Hand der Schlüssel, e Cherze und Zündhölzli. I bi ganz glücklech gsi, wieder imene Bett z'schlafe und allei z'sy. E chly uheimlich isch es mir scho vorcho, so ganz mueterseelenallei i däm grösse Huus. Aber i ha d'Huustür bschlosse und der Schlüssel näbem Chopfchüssi a Bode gleit. Wenn i de z'Nacht öppe dran erwachet bi, dass d'Wänd vo der Chelti gchlepft hei und i Liecht gmacht ha, han i mi z'erschüt mässe bsinne, won i eigetlech o syg. Die zitterigi Cherze-flamme het d'Schuelbänk so gross a d'Wänd gworfe und ds Wandtafelegstelli het usgseh wien e Grittibänz wo wott abechneule und die volli Wasserfläsche ufem Pult het so gschpässig lüüchtendi Ringe a ds Täfer zeichnet, dass es eim scho es bitzli gruselet het. Aber de han i mi dräiht, ha der Schlüssel i d'Hand gnoh und dänkt: es söll mir numen eine cho!

Ja, und du isch wahrhaftig eine cho, sogar meh als eine. Grad i der Nacht uf dä Tag, won i der Herr Dokter gfragt ha, wenn i ächt chön abträtte, wil i scho wyter verschproche heig, und er mi nume so aknurret het und öppis brümelet, das hang vo der Gmeind ab. Grad i däre Nacht han i Tritte ghört, wo nächer cho sy. Z'erschüt han i nid gwüss, ob i es Näggi erwütscht heig oder ob i troumi. Bis es du e chly ugattig a d'Türe chlopfet. Wohl, du bin i ufgfahre und ha mi welle alege; im Hemli han i mi nid welle la üherrample. Es isch mir aber kei Zyt meh blybe. Dusse het's es zwöitsmal polderet

und dermit isch o d'Tür ufgange, wil i die nid bschlosse ha. - Gleitig han i no chönne d'Bei under d'Dechi zieh und ha mi tröschtet, Ybrächer machi nid eso Lärme. Underwyle sy si du ynecho, fyrlech wie d'Gralsritter im Parsival, e Kuppelle Manne. Jede het e schwarzi Zötlichappe über d'Ohre zoge gha, und o drunder isch nid viel z'gseh gsi. Numen a der Wand isch die ganzi Gsellschaft no einisch erschine, gross und schwarz. Wo si mi du im Bett gseh hei, hei si sich es bitzli geniert; eine het der ander gmüpft, wil keine het welle rede. Wos du trotzdem no still blyben isch, het sich der Gmeindschryber gräuschperet und mir verchündet, si heige inere usserordentliche Gmeindsversammlung (herrjeh, scho die zwöiti wäge mir!) beschlosse, mi z'frage, ob i nid wetti dablybe. Si heige neuis ghört, i welli wyterzieh und das wär ihne nid rächt. Wenn myni Aschprüch ihres Budget nid z'underobsi machi, würde si's als "opportun erachte", mi azstelle. Mit däm het er gschlosse gha und i ha gmerkt, wie die Manne sich strecke im Gfuehl, si syge doch e ganz e fortschrittliche Gmeind.

D'Iag isch meh als glunge gsi. I ha nid rächt gwüss, wohi luege und ha o nid der Muet gha, si mit eme blutte Neivor de Chopf z'stosse. Drum han i se welle druf lüpfe, sälber yzge, dass i hie nid a mym rächte Platz wäri. I ha se du gfragt: "Jä, u de, was sött i de mache, wenn's kei Grippe meh gäb?" "O ja, het's gheisse, da hei mir o scho drüber nache gsinnet und chönntes scho brittle. Arbeit het's geng i der Gmeind. Bis jitz het d'Hebamme der ganz gesundheitlech Diensch allei gha, Ihr chönntet Ech de mit ihre dry teile."

"Jä, was isch de das, dä gesundheitlech Diensch?" Es isch mir grad e Tschuder vo Reschpakt der Buggel abgloffte by däm Wort. Es het mi so es bitzeli an e prüssischi Medizinalverordnig gmahnet, und na so einere hätt i jitz gar kei Längizyti gha. Me isch halt nid geng glych guet ufgleit für es Wiedersehe. "He ja, vorcho tuet ja geng öppis, Lüüs het's ds ganz Jahr i der Schuel und sötte die einisch mangle, so hei mer däicht, es heig im ganze Dorf no kei Hüetlere und Ihr als "Gstudierti" wärdet wohlöppe im Schtang sy, anere Burefrou oder enere Tächter e Vielibutsch uf e Sunntighuet z'mache."

Das wär also ds Programm gsi: Nisse jage, Chöpf putze, em Verschönerigsverein als Modistin z'diene und wär weiss, villicht im Notfall sogar no d'Tierliebamme z'mache, denn si hei ja wäger la düreluege, si möchte äben öpper, wo, wie ig, wüss mit em Vieh umzgang und chörn e Stall putze, also e vielsytige und usaufähige Poschte, sicher aber ds originellschte Agebot, won i je werden übercho. Jitz het's mi du aber nümme nume i der Illusion bisse, wie vori, won i mir my Zuekunft i däm Dorf usgmalet ha. Wahrscheinlich hei sich es paar vo däre Tierli us em Halblyn i myni wermeri

Dechi gflüchtet gha und i ha mässe derzue tue, die ständligi Sitzig z'Aend z'bringe. I ha däne Gmeindrät dankeiget gseit für ihres Vertrou und ha ne Bricht verschproche, sobald i mir alles guet überleit heig. Es het mi fascht agschämt, se eso use z'studele, aber i ha trotzdem nid im Sinn gha, mi da hinde z'vergrabe, chuum bin i im Bruef verwurzlet gsi.

Der guet Herr Dokter het mir am nächschte Tag scho vo wytem zueblinlet. Er het mir us der Chrott ghulfe und verschproche, däne Manne d'Sach z'erkläre. Druf hei si du wäger em Verband brichet, si wette e Gmeindschwöschter astelle, wo mit em Vieh Bscheid wüssi. Das het mir du vo oben abe no Vorwürf ytreit und mi het's für nötig gfunde, mir d'Gränze vom Schwöschterebuef z'expliziere.

Na es paar Tage bin i du heizue. Ds ganze Dorf het mir welle danke und het allergattig Guets us em Gänterli und em Chemi mir uf e Wäg mitgäh. Ds alte Mareli het Träne i den Ouge gha und het gjammeret, wenn es nume jünger wär, es wett schuerstracks ga "Schwöschter gäh." Treuhäzigi vo däne Lüt het mi grüehrt und i ha erscht z'grächtem gmerkt, wie stark i mit ne verbunde gsi bi. Für Jede han i mi gfreut, wenn er wieder umegloufe isch, nachdäm i ne solang nume under der Betdecke gfunde ha. Es isch mir wehmütig worde, z'vollem isch mir aber ds Härz ufgange, won i bim Rank no einisch ds ganze Dorf wie uf eme Bild ha gseh vor mir lige. Und i bi überzügt gsi, dass i chuum no einisch es settig! Gotthelf-Episode erläbe wärdi.

ENDE

DIE BUNTE SEITE



Hunger, Kälte, Schnee und Eis sind die winterlichen Feinde unserer stolzen Alpentiere. Dieses prachtvolle Zehnder, ein wirklich seltenes Exemplar, hat den Kampf ums Dasein nicht überstanden und wurde in der Gegend von Zernez tot aufgefunden. Er bildet gegenwärtig die kleine Sensation des Bündner Dorfes, und an seinem stolzen Geweih kann sich die Schuljugend kaum satt sehen. (ATP.)